



Siverth K. Heilmann

UKA 2022/60-1

Atassut

18. oktober 2022

**Aqqusinikkut angallannermut oqartussaaffiup pigisanullu nalilinnut inatsisip  
tiguneqarnissaanut tunngavissat tamarmik nassuaasiorgagineqarnissaat siunertaralugu  
Naalakkersuisut Naalagaaffiup oqartussaasuinut saaffiginneqqullugit peqquneqarnissaannik  
Inatsisartut aalajangiiffigisassaattut siunnersuut.**

(Inatsisartunut ilaasortaq Kuno Fencker, Siumut)

Siunnersuuteqartoq Kuno Fencker, Siumut qutsavigaatsigit inatsisartunut aalajangiiffigisassatut  
siunnersuuteqarninnut, imatullu Atassummiit oqaaseqarfigissavarput.

Aqqusinikkut angallannermut oqartussaaffiup pigisanullu nalilinnut inatsisip tiguneqarnissaanut  
tunngavissat tamarmik nassuaasiorgagineqarnissaannik siunertaqarluni Naallakkersuisut Inatsisartut  
peqquneqarnissaannik kissaateqassalluni ajunngikkaluaqisoq, taamaattoq eqqarsaammernarpoq, sooq  
oqartussaaffimmik ilaannakuusumillu tigusisinnaanissamik saaffiginnissuteqassaagut?

Naalagaaffimmiiit suli politeeqarneq eqqartuussiveqarnerlu angerlaassimangnisarpassuatsinnut  
ilaavoq. Taamaakkaluartoq aqqusinikkut angallannermut il. il. inatsiseqarnerput aallaavigalugit  
politiinit malitsinneqarnissaa nakkutigineqarpoq, unioqqutitsimasoqartillugulu, soorunami  
eqqartuussisarnermi inatsiserput malillugu unnerluussinerit ingerlanneqartarlutik.

Siunnersuuteqartup tunngavilersuutaani ilaavoq, klima pissutsillu allat inatsisiortunit annertuumik  
ilisimasaqarfiginissaat pingaaruteqartoq, taamatut isumaqarneq assortorusunngivippara, inatsisimmi  
allatuulli naleqqussarneqartuartariaqartarneri oqariartuutigisakkatsinnut ilaammata. Politiitut  
ukiorpaalussuarni sulismaninni, Nunatsinni Nunattalu avataani malitsikkuminaalluinnartunik  
peqquussusiornerit inatsisiortoqartarneralu ilaatigut naammattoortarpara.

Qujanartumilli inatsiliortutut inatsisartuni kommuune-nilumi aqqusinikkut pinngortitamiliuunniit  
angallannikkut atortut nutaanut ilaatigut naleqqussaanigut aamma pisariaqarfíini Folketing-i  
aqqutigalugu allanngortittariaqarnissaannik imalinnik apuussaqartarluta. Soorunami suleriaaserput

malillugu tusarniaanerit susassaqartullu peqataatereerlugit, inatsisitigut peqqussutinillu naleqqussaanerit ingerlasarput. Toqqaannartumik aperineqassaguma, soorunami itisiliinissamut periarfissaq atorumaarpaa.

Kalaallit Nunaat naalagaaffinngoriartornermi isummanik taakkuninnga sukumiisumik misissuinissaa inissaminissasoq, EU-llu isigininnittaasia malillugu nunatut allatut isagineqaleqqunata, immaqa Island Norgilu assigalugit, aaqqissutinik nassaarsinnaanerput, siunnersuuteqartup naggasiinermini tikippaa.

Siunnersuuteqartoq apererusunnarpoq, pitsaanerussagaluannginnersoq, Politeeqarneq Eqqartuussiveqarnerlu, Nunatsinnut angerlaanneqassappat, aningaasatigut inuttaqarniarnikkullu qanoq kinguneqassanersoq, Naalakkersuisut Naalagaaffiup oqartussaasuinet saaffiginnissutigineqassappat?

Inatsisartunimi ataasianngeqaagut, Naalagaaffimmiit oqartussaaffiit ilaannik Nunatsinnut angerlaanneqarsinnaaneranik oqallisiginnittarnerput, ilaatigut Inussutissalerinermi oqartussaaffiup angerlaassinnaanera Atassummiit tapersersugarput, aporfiiit assigiinngitsut peqqutaallutik, ulloq manna tikillugu suli iluatsinngitsunut ilaaginnarpoq.

Taamatut Atassummiit oqaaseqarluta, inassutigiinnassavarput ataatsimiititaliamut susassaqartumut suliap aappassaaneerneqartigani ingerlanneqaqqaassasoq aammalu oqariartutigisatta nalilorsorlugit quleqtarineqartumullu allannguiteqartoqarsinnaanera nalilorsorneqaqqullugu.

Qujanaq.